

## Ngën-gi-woy

<sup>1</sup> Lii, di ngën-gi-woy, ñeel Suleymaan.

*Ndaw si*

<sup>2</sup> Fóon maa, ngalla foon ma,  
sa cofeel a ma dàqal biiñ.

<sup>3</sup> Sa diw yi ngay xeeño neex,  
saw tur jib, mel ni lu xeeñ a xelli.  
Moo tax janq ji nob la.

<sup>4</sup> Yóbbaaale ma, nu daw, dem.  
Sama buur, yóbbu ma sa néeg,  
nu bokk mbég ak bannex,  
di tàqamtikoo sa cofeel gi dàq biiñ.  
Ñoo yey nob la!

*Njèkke ñooru, mujje xejjoo*

*Ndaw si*

<sup>5</sup> Yeen janqi Yerusalem, damaa ñuul, rafet;  
ñuul ni xayma ya ca Kedar\*,  
mel ni ridoy Buur Suleymaan.

<sup>6</sup> Buleen ma xoole sama ñuulaay bi,  
jant bee ma lakk.

Samay càmmiñ a ma mere,  
di ma wattuloo toókëri reseñ ya,  
te wattuwuma sama toókëri bopp†.

<sup>7</sup> Sama soppey xol, ngalla wax ma

---

\* **1:5** 1.5 Kedar diiwaanu Arabi la woon bu genn giirug Ismayla dèkke woon bu yàgg. Dañu daan defare seeni xayma ay deri bëy yu ñuul. † **1:6** 1.6 toókër ak càmm ay baat la yu ñuy méngalee ndaw si ci waxin. Seetal it ci 1.8.

ana fooy foral,  
 di fa gooral, digg bëccëg?  
 Lu ko moy may muuru, di la wër  
 fi say xarit ak seeni gétt.

### *Waa ji*

<sup>8</sup> Aa! Xamoo koo?  
 Yaw mi dàq ci jigéen ñi!  
 Génnal rekk, topp wewi jur gi,  
 sàmmi say tef,  
 fi dendeek mbaari sàmm si.

<sup>9</sup> Xarit, xam nga lu ma lay xoole?  
 Yànjaayu wajan wu takk watiiru Firawna.

<sup>10</sup> Sa lex yaa ngi tàkk fi digg sàdd yi!  
 Céy wii loos ak caqu peram!

<sup>11</sup> Sàddi wurus lanu lay defaral,  
 tapp ca xaalis.

### *Ndaw si*

<sup>12</sup> Li sama buur tëdd, di xéewlu lépp,  
 maa ngi gilli lu neex.

<sup>13</sup> Sama nijaay di mbuusum ndàbb  
 may fanaan sama digg ween.

<sup>14</sup> Saa nijaay, saa cabbu tóor-tóoru fuddën,  
 fa digg tóokëri Engedi†.

### *Waa ji*

<sup>15</sup> Xarit, yaaka rafet,  
 yaaka taaru!  
 Say gèt niy pitax.

---

† **1:14** 1.14 tóokëri Engedi bëtu ndox la bu nekk ca sowub géēju Xorom ga. Engedi di tekki «bëtu ndoxu bëy».

*Ndaw si*

<sup>16</sup> Nijaay, yaaka góorayiw,  
yaaka maa neex!

Mbooy gu naat, nu laloo,  
<sup>17</sup> garabi seedar di sunu xànqi néeg,  
garab gu dul ruus xadd koŞ.

**2**

<sup>1</sup> Waaye man saxayaayu joor doŋŋ laa,  
nirook as tóor-tóor ciw xur.

*Waa ji*

<sup>2</sup> Xanaa as tóor-tóor su ne ràññ ci biiri dég!  
Kookooy sama xarit ci biir janq ji.

*Ndaw si*

<sup>3</sup> Mbete garab gu gëna neex ci gott bi,  
kookooy sama nijaay ci biir xale yu góor yi.  
May bége keppaaram, safoo doom ya.

<sup>4</sup> Dugal na ma néegub sago-jeex-na,  
yiire ma mbëggeel.

<sup>5</sup> Gaaweleen ma nàkki reseñ, ma dëgër,  
leel-leen may meññeef, leqlee ma.  
Wopp laa def ndax mbëggeel!

<sup>6</sup> Sama càmmoñu waay, ma gegenoo,  
ndijooram, ma laxasoo.

<sup>7</sup> Yeen janqi Yerusalem, waatal-leen ma  
ci taaru kéwél ak koobay àll bi,  
ne dungeen dakkal te dungeen sooke tëraayu  
mbëggeel

---

Ş **1:17** 1.17 seedar ak garab gu dul ruus ay garab lañu yu neex xet.

te jotul.

*Wootante jib na*

*Ndaw si*

<sup>8</sup> Dégluleen, sama nijaay a,  
mu ngooguy ñëw,  
di xéluy jéggi tund yu ndaw yi,  
di tëb tund yu mag yiy dikk.

<sup>9</sup> Sama nijaay a ngi mel ni kéwél,  
mbaa kooba gu ndaw.

Mu ngi noonu taxaw ca gannaaw miir ba,  
di séentu ci palanteer bi  
ak a yër ci caax bi.

<sup>10</sup> Sama nijaay ne ma:

«Xarit, ayca,  
jongama sama, dikkal boog!

<sup>11</sup> Xoolal, tawub sedd wees na,  
waame jàll, wéy\*.

<sup>12</sup> Tóor-tóor yi lal na réew mi,  
jamonoy woy dikk,  
sabum pégét† jibe sunum réew.

<sup>13</sup> Figg a ngi ñorsi,  
reseñ tóor, di gilli.

Xarit, ayca,  
jongama sama, dikkal boog!»

*Waa ji*

<sup>14</sup> Soppe, sore nga ni xati mu dëkke xar-xari doj,  
làqoo ruqi mbartal yi.

---

\* **2:11** 2.11 Ci Israyil, jamonoy sedd day taw. Bu taw bi jeexee, tangoor wi dikk, gancax gi jebbi, daldi naat. † **2:12** 2.12 pégét xeetu picc la mu nirool pitax.

Won ma sa jëmm,  
 dégtal ma sa baat.  
 Sa baat a neex,  
 sa jëmm jekk!

### *Ndaw si*

<sup>15</sup> Jàppal-leen ma till yi,  
 till yu ndaw yiy ruur reseñ,  
 te sunu reseñ jiy tóor.

<sup>16</sup> Sama nijaay, maa moom, man it, moo moom,  
 di fore digg tóor-tóor yi.

<sup>17</sup> Nijaay, balaa jant a fenk,  
 ker toxu,  
 dellul gaaw ni kéwél,  
 mbaa kooba gu ndaw kaw tund yu xàjjalikoo ya.

## 3

### *Réeroo, gise*

#### *Ndaw si*

<sup>1</sup> Sama kaw lal, guddi,  
 laa seet sama soppey xol.  
 Seet naa ko, gisuma ko.

<sup>2</sup> Naa jóg, wër dëkk bi.  
 Mbedd yeek pénc yi  
 laay seete sama soppey xol.  
 Seet naa ko, gisuma ko.

<sup>3</sup> Wattukat yee ma gis,  
 ba ñuy wër dëkk bi.  
 Ma ne leen: «Sama soppey xol, gisuleen ko?»

<sup>4</sup> Ma romb leen tuuti rekk,  
 gis sama soppey xol.

Ma ne ko taral, bàyyeetuma ko,  
ba yóbbu ko sama kër yaay,  
ba sama biir néegu ndey ji ma jur.

<sup>5</sup> Ngalla yeen, janqi Yerusalem, waatal-leen ma  
ci taaru kéwél ak koobay àll bi,  
ne dungen dakkal te dungen sooke tëraayu  
mbëggeel  
te jotul.

*Daagu, jëm toolu mbëggeel*

*Ñeneen*

<sup>6</sup> Ana luy jóge màndiñ ma nii,  
mel ni taxaaru saxar,  
suuroo ndàbb ak xas mu xeeñ  
ak mboolem cuuraayi jula?

*Ndaw si*

<sup>7</sup> Laltub Suleymaan a ngoog,  
juróom benn fukki jàmbaar dar ko,  
di jàmbaari Israyil.

<sup>8</sup> Népp mane saamar,  
ku ci nekk mokkal xare,  
saamar ci pooj,  
ngay fàggu mbettum guddi.

<sup>9</sup> Ab toogu la Buur Suleymaan defarlu,  
ñu defare ko bantu Libañ,

<sup>10</sup> ponku ya, mu def ko xalis,  
wéeruwaay ba wurus;  
tooguwaay ba di ndimo lu xonq curr,  
biir ba di liggéeyu ràbb  
bu janqi Yerusalem ràbbe cofeel.

<sup>11</sup> Yeen janqi Siyoñ, génneen,

xool Buur Suleymaan ak mbaxanam céetal  
mi ko yaayam solal ci bésuub céetalam,  
bésu bânneexam.

## 4

### *Waa ji*

<sup>1</sup> Yaaka rafet, xarit, yaaka taaru!  
Sa gët yi niy pitax, làqoo muuraay bi,  
njañ liy loy-loyee ngi saf géttu bëy yu ñuul  
yu bartaloo kaw tundu Galàdd.

<sup>2</sup> Sa gëñ yi weex ni xar yu ñu wat  
ñuy yéeege ca sangukaay ba,  
ku nekk ak seexam,  
kenn wéetu ca.

<sup>3</sup> Sa tuñ yi mel ni wëñ gu xonq curr,  
ndaw gémmiñ gu jekk!  
Sa lex yiy tàkk ni ñaali gërënaat,  
làqoo sa muuraay bi;

<sup>4</sup> sa loos wi ne coleet ni tatay Daawuda,  
mërgalu ba jekk,  
caq bay lang ni junniy kiiraayi jàmbaar.

<sup>5</sup> Sa ween yi ni ñaari tef,  
mbaa seexi kéwél yuy fore digg tóor-tóor yi.

<sup>6</sup> Balaa jant a fenk,  
ker gàddaay,  
ma ne coww diggante tund wa ndàbb ne bann,  
ak tund wa xas ma neexe.

<sup>7</sup> Xarit, sa lépp a rafet,  
sikk nekkul ci yaw.

<sup>8</sup> Séet sama, jógeel Libañ, jege ma,  
bawool Libañ, jegesi ma.

Wàcceel colli Amana  
ak colli Senir ak Ermon.  
Génnal xunti gaynde yooyook  
tundi segg ya.

<sup>9</sup> Jigéen sama, séet sama, benn yoon nga ma xool,  
sama fit ne tërit.  
Sa benn peru caq rekk,  
sama fit ne tërit.

<sup>10</sup> Jigéen sama, séet sama,  
sa mbëggeel a neex!  
Sa mbëggeel a dàq biiñ,  
sa diw yu xeeñ dàq luy cuuraay.

<sup>11</sup> Séet sama! Lem ay xellee sa gémmiñ,  
lem ak meew lal sa làmmiñ.  
Sa xetu yére xetu àllub Libañ la.

<sup>12</sup> Jigéen sama, séet sama, yaay tóokër bu tëje,  
yaay seyaan bu tëje,  
di bētu ndox bu saañe.

<sup>13</sup> Yaa di toolub gërënaat bu naat,  
meññ ngën-gi-meññeef  
ak fuddën ak reen yu xeeñ,

<sup>14</sup> muy reen yu xeeñ, safron, barax, kanel,  
ak xasoo xas mu xeeñ,  
ndàbb ak alowes  
ak lépp lu xeeña xeeñ.

<sup>15</sup> Yaa di bētu ndox ci tool yi,  
di teen bu fees ak ndox muy daw,  
wale tundi Libañ.

### *Ndaw si*

<sup>16</sup> Yaw, ngelawal bëj-gànnaar, yewwul,  
ngelawal bëj-saalum, dikkal,  
wolal-leen ma sama tool bi,



mu gilli;  
sama nijaay dugg toolam,  
xéewloo ngën-gi-meññeefam.

## 5

### *Waa ji*

<sup>1</sup> Jigéen sama, séet sama, dikk naa sama tool,  
sama ndàbb ak sama cuuraay, ma for,  
sama lem xelli, ma lekk,  
sama biiñ ak sama meew, ma naan.

### *Awu*

Yeen soppe yi, lekkleen;  
yeen ñi bëggante, naanleen ba màndi.

### *Xol jeex na, mujje neex*

#### *Ndaw si*

<sup>2</sup> Maa ngi nelaw, te xol yewwu;  
dégluleen, sama nijaay ay fëgg.  
Mu ne: «Xaritoo, jigéen sama, ubbil ma,  
sama nenne, alal sama!  
Sama bopp a ngi laye ba tooy,  
njañ li fanaanee guus.»

<sup>3</sup> Ma ne ko: «Summiku naa de,  
xanaa дума soluwaat?  
Jàngu naa jeeg,  
xanaa дума taqati?»

<sup>4</sup> Sama nijaay yoor loxoom ci xarante bi,  
sama yaram ne sàyy.

<sup>5</sup> Ma ne bërét, di ubbil nijaay,  
sama yoxo yi, diwu ndàbb di ca siit,  
sama waaraam yi, ndàbb rogalaat  
ba ci njàppul bunt bi.

<sup>6</sup> Maa ubbil nijaay,  
waaye nijaay waññiku na, ba wéy.  
Ba mu waññikoo, tuuti ma dee.  
Seet naa ko, gisuma ko;  
ma woo ko, wuyuwul.

<sup>7</sup> Wattukat yiy wër dëkk bi gis ma;  
ñu dóor ma, gaañ ma,  
ñori sama malaan.  
Wattukati tata jaa!

<sup>8</sup> Ngalla yeen, janqi Yerusalem, waatal-leen ma  
ne su ngeen gisee sama nijaay,  
ne ko damaa wopp ndax mbéggeel.

### *Janqi Yerusalem*

<sup>9</sup> Yaw mi dàq ci jigéen ñi,  
ana lu sa nijaay gëne keneen?  
Ana lu mu éppelee keneen,  
ba nga di nu waatloo lii?

### *Ndaw si*

<sup>10</sup> Sama nijaay daa xees, leer;  
kenn la ci fukki junniy góor.

<sup>11</sup> Kanam gi ni wurus, di wurusu ngalam;  
njañ li lëmësu,  
ñuul ni ndobin.

<sup>12</sup> Gët yi ni pitax yu feggook wali ndox,  
sangoo meew,  
feggook ndox mu ne xéew.\*

<sup>13</sup> Lex ya di tool,  
gàncax ga ne ca bann,  
tuñ ya diy tóor-tóor,

---

\* **5:12** 5.12 Li ñu wax fii ci làkku ebrë am na werante.

ndàbb wale ca, rogalaat.

<sup>14</sup> Yoxo yi banti wurus la,  
ngën-gi-per tappe ca;  
jëmm ja rattax ni bëñu ñay  
laloo peri safiir;

<sup>15</sup> yeel yi kenuy doj wu jafe la,  
sampe ci tàñki wurusu ngalam.  
Meloom ni tundi Libañ,  
di tànnéef ni garabi seedar.

<sup>16</sup> Gémmiñam, bannexi neen,  
jëmmam jépp jara xédd!  
Yeen janqi Yerusalem,  
sama nijaay a ngoog, samab xarit.

## 6

### *Janqi Yerusalem*

<sup>1</sup> Yaw mi dàq ci jigéen ñi,  
ana fu sa nijaay dem?  
Wax nu fu sa nijaay jaar,  
nu seetle la ko.

### *Ndaw si*

<sup>2</sup> Sama nijaay dugg na biir toolam,  
fa gàncax ga ne bann.  
Mu ngi foral ci tool bi,  
ak a fori tóor-tóor.

<sup>3</sup> Man, nijaay a moom;  
nijaay it, maa moom.  
Mooy fore sama digg tóor-tóor yi.

### *Yaaka taaru*

### *Waa ji*

<sup>4</sup> Xarit, taaru nga ni Tirsa ak Yerusalem,  
péeyi buur ya,

yéeme nga ni péey yu kawe ya!

<sup>5</sup> Wuy, geesul fee!

Soo ma nee jàkk, ma jànnaxe.

Sa njañ liy loy-loyee ngi saf géttu bëy yu ñuul,  
yu bartaloo kaw tundu Galàdd.

<sup>6</sup> Sa gëñ yi ni mbote yu weex,  
yéege ca sangukaay ba,

ku nekk ak seexam,

kenn wéetu ca.

<sup>7</sup> Sa lex yiy tàkk ni ñaali gërënaat,

làqoo sa muuraay bi.

<sup>8</sup> Buur day am juróom benn fukki lingeer

ak juróom ñett fukki jongama

ak jeeg ju dul jeex.

<sup>9</sup> Waaye sama nenne kenn la, matal ma sëkk,  
yaayam kennal ko,

muy ngëneelu biiru yaayam.

Janq ji gis ko, di ko jéwe mbégteem,

lingeeri buur aki jongamaam di ko kañ.

<sup>10</sup> Ña nga naa: «Ndaw sii ku mu?

Bu nee xiféet, nga ne fajar a xar,

rafet ni leer gu ndaw,

yànj ni jant bi,

yéeme ni gàngoori biddiwi!»

<sup>11</sup> Damaa wàcc ba ca toolub saal ya,

xooli cax mu yees mi ci xur wi,

bu reseñ ji jebbee,

mbaa gërënaat ji tóor, ma gis.

<sup>12</sup> Damaa ràkkaaju bay lox,

mel ni ku war watiiru buur\*.

---

\* **6:12** 6.12 Li ñu wax fii ci làkku ebrë am na werante.

## 7

*Janqi Yerusalem*

<sup>1</sup> Dikkal, janqu waa Sulam bee, dikkal;  
dikkala dikk, nu niir la.

*Waa ji*

Moo, lu ngeen di seetaane janqub waa Sulam bi  
ni kuy fecc galanu Ñaari Dali Xare?

<sup>2</sup> Janqoo, lingeer sama,  
sa tànk yee ka jekk ci sa dàll yi,  
sa mooco yi mērgalu niy jaaro  
yu ndaanaanu tēgg yette loxoom.

<sup>3</sup> Sa jumbux bi di kaas bu mērgalu,  
yàlla bumu ñàkk biiñu njafaan!  
Sa biir bi di jalu pepp  
mu ay tóor-tóor ñag.

<sup>4</sup> Sa ween yi ni ñaari tef,  
mbaa seexi kéwél.

<sup>5</sup> Sa loos wi, coleet, rattax, ni tatay bëñi ñay;  
say gët di lerxat ni déegi Esbon,  
ya feggook buntu Bat Rabim.  
Sa bakkan bi jub xocc ni tatay Liban  
ja tiim Damaas.

<sup>6</sup> Sa bopp siggi ni tundu Karmel,  
njañ liy nes-nesi ni sooyu buur,  
létt yay fëy-fëyi, ba laaw buur.

<sup>7</sup> Rafet, sopploo!  
Soppee, bänneex nga!

<sup>8</sup> Sa taxawaay bii garabu tàndarma la,  
sa ween yi di cēggi doom ya.

<sup>9</sup> Ma ne, maay yéeg tàndarma gi,  
ñëb doom yi.

Yal na say ween di sama cëggi reseñ,  
sag noo jox ma doom yu xeeñ,  
10 sa gémmiñ di xelli ngëneelu biiñ.

*Ndaw si*

Na walal sama nijaay,  
tuurul ñiy nelaw.

11 Man, nijaay a moom,  
te maay nammeelam.

*Ayca ca tool ba*

*Ndaw si*

12 Nijaay, ayca nu dem tool ba,  
fanaani ca tóor-tóori fuddën ya\*.

13 Nan teela xëyi ca tóokëri reseñ ya,  
bu reseñ ji jebbee,  
mbaa tóor-tóor yi focci,  
mbaa gërënaat ji tóor, nu gis.  
Fa laa lay jébbale mbëggeel.

14 Tóor-tóor yu xeeñ† yaa ngi gilli,  
lépp luy doom yu neex aje sunu bunt néeg,  
yu yees yaak ya woon,  
ma boole dencal la, nijaay.

## 8

1 Éy su meloon ni sama càmmiñ nga,  
mel ni ku ma bokkal wenn ween,  
ba ma dajeek yaw biti, sañ laa dar,  
te du tax ñu sikk ma!

2 Ma jàpp la, yóbbu sama néeg yaay,

---

\* **7:12** 7.12 Mbaa: ca dëkk yu ndaw ya. † **7:14** 7.14 tóor-tóor yu xeeñ yi màndaragoor la ci làkku ebrë. Ñu yaakaar ne, day may góor doole tey giiral jigéen.

moom mi ma yar,\*  
 ma may la biiñ bu saf,  
 ak sama ndoxum gërënaat, nga naan.

<sup>3</sup> Sama càmmoñu waay, ma gegenoo,  
 ndijooram, ma laxasoo.

<sup>4</sup> Yeen janqi Yerusalem, waatal-leen ma  
 ne dungeen dakkal te dungeen sooke tēraayu  
 mbëggeel  
 te jotul.

*Joxe naa xol  
 Janqi Yerusalem*

<sup>5</sup> Ana ndaw suy jóge màndinj ma nii,  
 wéeroo nijaayam?

*Ndaw si*

Ci ron pom gi laa la yee,  
 fa la sa yaay jàppe ëmb,  
 jur la fa.

<sup>6</sup> Teg ma ci sa xol ni torlukaay†,  
 mbaa ci sa përeg ni lamu màndarga.  
 Mbëggeel a bare doole ni ndee,  
 fiiraange xér ni bàmmeeel.

Day jàpp jippét,  
 di jum bu Aji Sax ji taal.‡

<sup>7</sup> Ndox mu ne xéew du fey mbëggeel,  
 ay dex du ko mëdd.

Ku koy weccee sa alalu kër gépp it,  
 ñu jéppi laa jéppi rekk.

---

\* **8:2** 8.2 Mbaa: nga jàngal ma baane, † **8:6** 8.6 torlukaay  
 mooy juntuukaay bu mel ni lu ñuy tàmponee. ‡ **8:6** 8.6 Mbaa:  
 tàkk di sël-sëli.

*Càmmiñi ndaw si*

<sup>8</sup> Sunub jigéen lu ndaw la,  
ween sax amu ko.  
Lu nuy defal sunub jigéen  
bés bu ñu koy béggsi?

<sup>9</sup> Su doon am tata,  
nu tabaxal ko soorooru xaa<sup>l</sup>is.  
Su doon bunt,  
nu aare ko xànqi seedar.

*Ndaw si*

<sup>10</sup> Maa dim tata,  
sama ween di sooroor ya;  
moo tax waa ji xam ne  
maa di jàmmam.

<sup>11</sup> Suleymaan am na reseñ ca Baal Amon.  
Da koo dénk ay beykat.  
Ku nekk di ko fey meññeef ma  
junniy dogi xaa<sup>l</sup>is.

<sup>12</sup> Junniy dogi xaa<sup>l</sup>is yi,  
Suleymaan, yaa ko moom;  
ñaar tééméer yi, beykat yi.  
Waaye sama toolub reseñ, maa ko moom.

*Waa ji*

<sup>13</sup> Yaw mi tooge digg tool bi,  
samay xarit a ngi teewlu sa baat,  
waxal boog, ma dégg.

*Ndaw si*

<sup>14</sup> Nijaay, dawsil,  
melal ni kéwél,  
mbaa kooba gu ndaw



ci kaw tund wi ci gàncax gu xeeñ gi.

**Kàddug Yàlla gi**  
**Wolof Bible 2020 revision.**  
**La bible en wolof; revision 2020**

copyright © 2010, 2020 La Mission Baptiste du Sénégal

Language: Wolof

Dialect: Regional Wolof

Translation by: La MBS

For complete copyright statement, please see <http://sng.al/copyright>  
This translation is made available to you under the terms of the Creative Commons Attribution-Noncommercial-No Derivatives license 4.0.  
You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-07-22

---

PDF generated using Haiola and XeLaTeX on 11 Nov 2022 from source files dated 23 Jul 2020  
eb088fb7-76e3-5c5f-ab35-a0da6cd8fd40